

განხილულია ფაკულტეტის საბჭოს სხდომაზე: ოქმი № 20 - 21, 30.06.2021
დამტკიცებულია მმართველი საბჭოს გადაწყვეტილებით: დადგენილება №6, 25.08.2021
პროგრამაში განხორციელებული ცვლილება:
განხილულია ფაკულტეტის საბჭოს სხდომაზე: ოქმი №ს6-21, 29.10.2021
დამტკიცებულია მმართველი საბჭოს გადაწყვეტილებით: დადგენილება №8, 01.11.2021

საბაკალავრო საგანმანათლებლო პროგრამა

ეკონომიკა

განათლების საფეხური:	ბაკალავრიატი (უმაღლესი განათლების I საფეხური)
სწავლების ენა:	ქართული ენა
საგანმანათლებლო პროგრამის ტიპი:	აკადემიური
დეტალური სფეროს დასახელება და კოდი:	0311 ეკონომიკა
მისანიჭებელი კვალიფიკაცია:	ეკონომიკის ბაკალავრი / Bachelor of Economics
სწავლის ხანგრძლივობა:	4 წელი (8 სემესტრი)
საგანმანათლებლო პროგრამის მოცულობა:	240 (ECTS) კრედიტი
პროგრამის ხელმძღვანელი:	ასისტენტ-პროფესორი აკაკი მოსახლიშვილი მობ.: (+995) 593 260 638 ელ.ფოსტა: akaki.mosakhlishvili@unik.edu.ge

პროგრამაზე დაშვების წინაპირობა

ეკონომიკის საბაკალავრო საგანმანათლებლო პროგრამაზე დაიშვება:

სრული ზოგადი განათლების დამადასტურებელი ან მასთან გათანაბრებული დოკუმენტის მქონე პირი, რომელიც ერთიან ეროვნულ გამოცდებზე მიღებული ქულების კოეფიციენტების რანჟირების საფუძველზე სწავლის უფლებას მოიპოვებს ქუთაისის უნივერსიტეტში.

პროგრამაზე ჩარიცხვისთვის აბიტურიენტი ვალდებულია ერთიან ეროვნულ გამოცდებზე ჩააბაროს შემდეგი საგნები: ქართული ენა და ლიტერატურა, უცხო ენა (ერთე-ერთი უცხო ენა: ინგლისური ენა, გერმანული ენა, ფრანგული ენა, რუსული ენა), მათემატიკა.

ერთიან ეროვნულ გამოცდებზე მინიმალური კომპეტენციის ზღვარია კანონმდებლობით განსაზღვრული მინიმალური ბარიერის დამღევა.

პროგრამაზე ერთიანი ეროვნული გამოცდების გავლის გარეშე სწავლის უფლება აქვთ:

პირებს, რომლებსაც „უმაღლეს საგანმანათლებლო დაწესებულებაში ერთიანი ეროვნული გამოცდების/საერთო სამაგისტრო გამოცდების გავლის გარეშე სწავლის უფლების მქონე აბიტურიენტების/მაგისტრანტობის კანდიდატების/სტუდენტების მიერ დოკუმენტების წარდგენისა და განხილვის წესის დამტკიცების შესახებ“ საქართველოს განათლებისა და მეცნიერების მინისტრის 2011 წლის 29 დეკემბრის №224/ნ ბრძანების საფუძველზე უფლება აქვთ ჩარიცხონ უნივერსიტეტში ერთიანი ეროვნული გამოცდების გავლის გარეშე. აღნიშნული პირები ვალდებული არიან დაადასტურონ ქართული ენის B2 დონეზე ფლობა „ქუთაისის უნივერსიტეტის სტუდენტის ენობრივი კომპეტენციის დადგენის წესის“ შესაბამისად.

პროგრამაზე ასევე დაიშვებიან:

„უმაღლესი საგანმანათლებლო დაწესებულებიდან სხვა უმაღლეს საგანმანათლებლო დაწესებულებაში გადასვლის წესისა და საფასურის დამტკიცების შესახებ“ საქართველოს განათლებისა და მეცნიერების მინისტრის 2010 წლის 4 თებერვლის №10/ნ ბრძანების შესაბამისად მობილობის წესით ჩარიცხულ სტუდენტები.

პროგრამის აქტუალობა

გარე სამყაროში მიმდინარე მოვლენები პირდაპირ და ირიბად გავლენას ახდენენ ეკონომიკურ გარემოზე და ზემოქმედებენ ეკონომიკურ საკითხებთან დაკავშირებულ გადაწყვეტილებებზე. ნებისმიერი ეკონომიკური ერთეულისთვის, იქნება ეს ინდივიდი, კომპანია თუ სახელმწიფო, სასიცოცხლოდ მნიშვნელოვანია გადაწყვეტილების მიღების პროცესი იყოს მკაფიო, დასაბუთებული და ეფექტური. ოპტიმალური ეკონომიკური გადაწყვეტილების მისაღებად აუცილებელია თეორიული ცოდნა და პრაქტიკული უნარები. ეკონომიკის საბაკალავრო საგანმანათლებლო პროგრამის აქტუალობა სწორედ იმიტომაა მაღალი, რომ პროგრამის ფარგლებში ამ კომპეტენციების შექმნა და დახვეწა შესაძლებელია. იმავდროულად, შრომის ბაზარზე შექმნილი ვითარება ნათლად

ასახავს კომპანიებისა თუ სახელმწიფოს მხრიდან შექმნილ მოთხოვნას კვალიფიციურ ეკონომისტებზე, რომელთაც წარმატებით შეუძლიათ პროგრამის ფარგლებში ათვისებული თეორიული და პრაქტიკული ცოდნა უამრავი ალტერნატივიდან საუკეთესოს ასარჩევად გამოიყენონ. პროგრამის ფარგლებში სტუდენტებს ეძლევათ შესაძლებლობა განიხილონ და პრაქტიკაში გამოსცადონ ის სტატისტიკური ინსტრუმენტები, რომელთაც ფართოდ იყენებენ ემპირიულ ანალიზში. მსგავსი შესაძლებლობა კიდევ უფრო წარმოაჩენს პროგრამის აქტუალობას, რადგან ეკონომიკური ანალიზის უნარზე მოთხოვნა მზარდია, როგორც გლობალურად, ასევე საქართველოში. ქუთაისის უნივერსიტეტის ეკონომიკის საბაკალავრო საგანმანათლებლო პროგრამა სტუდენტებს ასევე ათვისებობიერებს იმ სოციალური პასუხისმგებლობაშიც, რაც ეკონომიკურ ერთეულებს აკისრიათ - მიიღონ ისეთი ეკონომიკური გადაწყვეტილებები, რომლებიც შეესაბამება როგორც კომპანიის (ორგანიზაციის), ასევე საზოგადოების ინტერესებს. ეკონომიკის პროგრამა ასევე წარმოადგენს იმედისმომცემ საწყის საფეხურს მათთვის, ვისაც განზრახული აქვს სწავლის სამაგისტრო დონეზე გაგრძელება.

პროგრამის მიზანი

ეკონომიკის საბაკალავრო საგანმანათლებლო პროგრამის მიზანია:

1. მისცეს სტუდენტს ფართო თეორიული ცოდნა ეკონომიკის სფეროში და შეუქმნას მას წარმოდგენა ეკონომიკურ გადაწყვეტილებებზე მოქმედი ფაქტორების შესახებ. გაათვითცნობიეროს სტუდენტი ძირითად ეკონომიკურ კანონზომიერებებში;
2. შეუქმნას სტუდენტს წარმოდგენა თანამედროვე სტატისტიკური და ეკონომეტრიკული მეთოდების გამოყენებით ეკონომიკური ანალიზის ჩატარების შესახებ; შესძინოს მას მკაფიო, დასაბუთებული დასკვნის ფორმულირების კომპეტენცია; განუვითაროს კრიტიკული და კრეატიული ეკონომიკური აზროვნების უნარი;
3. განუვითაროს სტუდენტს კვლევის დამოუკიდებლად წარმართვის უნარი, რაც მას დაეხმარება როგორც შრომის ბაზარზე, ასევე აკადემიურ სივრცეში წარმატების მიღწევაში; უზრუნველყოს აკადემიური და პროფესიული ეთიკის სტანდარტების დაცვის მნიშვნელობის გააზრება, ასევე, იმ პასუხისმგებლობის გააზრება, რაც მას კოლეგებისა თუ საზოგადოების წინაშე აკისრია.

სწავლის შედეგები

ეკონომიკის საბაკალავრო პროგრამის დასრულების შედეგად კურსდამთავრებულს ჩამოუყალიბდება შემდეგი კომპეტენციები:

ცოდნა და გაცნობიერება

1. აღწერს ძირითადი ეკონომიკური დისციპლინების თეორიებსა და პრინციპებს, ბაზრის სახეობებსა და კონკურენციის ფორმებს, მოთხოვნა-მიწოდებაზე მოქმედ ფაქტორებს, ფასწარმოქმნის მექანიზმს, სახელმწიფოს ეკონომიკურ ფუნქციებს, ძირითად მაკროეკონომიკურ ინდიკატორებს;

2. განიხილავს საქართველოსა და მსოფლიო ეკონომიკაში მიმდინარე პროცესებს და აკავშირებს ამ პროცესებს ქვეყნის საჯარო ფინანსების, სექტორული ეკონომიკის და ეკონომიკური პოლიტიკის ძირითად პრობლემატიკასთან;

3. ახდენს ეკონომიკის მდგრადი განვითარების ძირითადი პრობლემების იდენტიფიცირებას და აკავშირებს მათ რესურსული პოტენციალის რაციონალურ გამოყენებასთან.

უნარი

4. კომუნიკაციისას იყენებს შესაბამის პროფესიულ ტერმინოლოგიას, მ.შ. უცხო ენაზე;

5. საინფორმაციო ტექნოლოგიების გამოყენებით, ინფორმაციის სტატისტიკური მეთოდებით დამუშავების საფუძველზე აყალიბებს რაოდენობრივი და თვისებრივი კვლევისთვის შესაფერის მოდელს; იყენებს ეკონომიკის თეორიულ ცოდნას და სიტუაციათა ანალიზზე დაყრდნობით ადგენს პრაქტიკული ხასიათის პროექტებს; იღებს დასაბუთებულ ეკონომიკურ გადაწყვეტილებებს;

6. აანალიზებს მიკრო და მაკროეკონომიკის, სექტორული და რეგიონული ეკონომიკის ძირითადი პრობლემატიკის თავისებურებებს და გამოწვევებს; ეროვნულ ანგარიშთა სისტემის განზოგადებული ანალიზით ერთმანეთს ადარებს ეროვნული და მსოფლიო ეკონომიკის განვითარების ტენდენციებსა და ძირითად მიმართულებებს.

პასუხისმგებლობა და ავტონომიურობა

7. ეკონომიკური საკითხების გააზრებისას აღიარებს სოციალური პასუხისმგებლობის ძირითად პრინციპებს და მათზე დაყრდნობით ახდენს საკუთარი პროფესიული და აკადემიური ღირებულებების დემონსტრირებას და დაცვას;

8. კონკრეტულ სიტუაციაში, საკუთარი ცოდნისა და უნარების გათვალისწინებით, ეთიკის პრინციპების დაცვით, ავტონომიურობის მაღალი ხარისხით, დამოუკიდებლად განსაზღვრავს, გეგმავს და იყენებს კვლევის მეთოდოლოგიას.

სწავლის შედეგები შეესაბამება ეკონომიკის საბაკალავრო საგანმანათლებლო პროგრამის მიზნებს, რაც დასტურდება მიზნებისა და შედეგების შესაბამისობის რუკით (იხილეთ პროგრამის დანართი №1 – „პროგრამის მიზნებისა და სწავლის შედეგების შესაბამისობის რუკა“).

საგანმანათლებლო პროგრამის კომპონენტებით უზრუნველყოფილია პროგრამის სწავლის შედეგების მიღწევა (იხილეთ პროგრამის დანართი №2 – „საგანმანათლებლო პროგრამის სწავლის შედეგების რუკა“).

პროგრამის მოცულობა

ეკონომიკის საბაკალავრო საგანმანათლებლო პროგრამა აგებულია კრედიტების ტრანსფერის ევროპული სისტემის (ECTS) საფუძველზე, სტუდენტზეა ორიენტირებული და ემყარება სტუდენტის იმ აკადემიურ დატვირთვას, რაც საჭიროა და უზრუნველყოფს საგანმანათლებლო პროგრამის მიზნებისა და სწავლის შედეგების მიღწევას.

1 კრედიტი მოიცავს 25 ასტრონომიულ საათს. კრედიტი დროის ერთეულში (სთ.) ასახავს სამუშაოს იმ მოცულობას, რომელიც საჭიროა სტუდენტის მიერ პროგრამის შესაბამისი სასწავლო კურსის ასათვისებლად და სწავლის შედეგების მისაღწევად. კრედიტი ითვალისწინებს საკონტაქტო და დამოუკიდებელი მუშაობის საათებს.

პროგრამის ხანგრძლივობა შეადგენს 4 (ოთხ) აკადემიურ წელს, ანუ 8 (რვა) სემესტრს, და მოიცავს 240 კრედიტს (6000 საათს).

სემესტრის განმავლობაში სტუდენტმა უნდა დაძლიოს საშუალოდ 30 კრედიტი (30 კრედიტი = 750 სთ.), ხოლო წელიწადში - 60 კრედიტი, თუმცა სტუდენტის ინდივიდუალური დატვირთვიდან გამომდინარე, წელიწადში კრედიტების რაოდენობა შეიძლება იყოს 60-ზე ნაკლები ან მეტი, მაგრამ არაუმეტეს 75 კრედიტისა.

ერთი აკადემიური წელი მოიცავს 42 კვირას, ერთი სემესტრი 21 კვირას, მათ შორის 15 კვირა არის სასწავლო, დანარჩენი 5 კვირა სასესიო. კერძოდ, მე-8-9 კვირა შუალედური გამოცდა, მე-18 და მე-19 კვირა დასკვნითი გამოცდების პერიოდი, მე-20 და 21-ე კვირა დამატებითი გამოცდების პერიოდი. დასკვნით და შესაბამის დამატებით გამოცდას შორის შუალედია შედეგების გამოცხადებიდან არა ნაკლებ 5 დღე.

სტუდენტის ცოდნის შეფასების სისტემა

შეფასების მეშვეობით განისაზღვრება სტუდენტის მიღწევების შესაბამისობა პროგრამის კონკრეტულ შედეგებთან. ეკონომიკის საბაკალავრო საგანმანათლებლო პროგრამაში სტუდენტის ცოდნის შეფასება დაფუძნებულია კრიტერიუმებზე, რომლებიც განსაზღვრავენ ფლობს თუ არა სტუდენტი სასწავლო კურსით განსაზღვრულ სწავლის შედეგებს.

პროგრამის ფარგლებში გამოყენებული შეფასების სისტემა შეესაბამება საქართველოს განათლებისა და მეცნიერების მინისტრის 2007 წლის 5 იანვრის №3 ბრძანებით დამტკიცებულ „უმალესი საგანმანათლებლო პროგრამების კრედიტებით გაანგარიშების წესს“.

სწავლის შედეგის მიღწევის დონე ფასდება შეფასების ფორმებით, შუალედური შეფასებით და დასკვნითი შეფასებით, რომელთა ჯამი წარმოადგენს საბოლოო შეფასებას. სასწავლო კურსის მაქსიმალური საბოლოო შეფასება შეადგენს 100 ქულას.

შეფასების სისტემა ითვალისწინებს:

ა) ხუთი სახის დადებით შეფასებას:

ა.ა) (A) ფრიადი – შეფასების 91-100 ქულა;

ა.ბ) (B) ძალიან კარგი – მაქსიმალური შეფასების 81-90 ქულა;

ა.გ) (C) კარგი – მაქსიმალური შეფასების 71-80 ქულა;

ა.დ) (D) დამაკმაყოფილებელი – მაქსიმალური შეფასების 61-70 ქულა;

ა.ე) (E) საკმარისი – მაქსიმალური შეფასების 51-60 ქულა.

ბ) ორი სახის უარყოფით შეფასებას:

ბ.ა) (FX) ვერ ჩააბარა – მაქსიმალური შეფასების 41-50 ქულა, რაც ნიშნავს, რომ სტუდენტს ჩასაბარებლად მეტი მუშაობა სჭირდება და ეძლევა დამოუკიდებელი მუშაობით დამატებით გამოცდაზე ერთხელ გასვლის უფლება;

ბ.ბ) (F) ჩაიჭრა – მაქსიმალური შეფასების 40 ქულა და ნაკლები, რაც ნიშნავს, რომ სტუდენტის მიერ ჩატარებული სამუშაო არ არის საკმარისი და მას საგანი ახლიდან აქვს შესასწავლი.

საგანმანათლებლო პროგრამის კომპონენტში, უარყოფითი შეფასების (FX) მიღების შემთხვევაში სტუდენტს ეძლევა დამატებით გამოცდაზე გასვლის უფლება. დამატებით გამოცდაზე გასვლის უფლებას სტუდენტი იღებს იმ შემთხვევაშიც, თუ მან დააგროვა საბოლოო შეფასების 51 ქულა ან მეტი, მაგრამ ვერ გადალახა დასკვნითი გამოცდისთვის განსაზღვრული მინიმალური კომპეტენციის ზღვარი. დამატებითი გამოცდა ინიშნება დასკვნითი გამოცდის შედეგების გამოცხადებიდან არანაკლებ 5 დღეში.

სტუდენტის მიერ დამატებით გამოცდაზე მიღებულ შეფასებას არ ემატება დასკვნით შეფასებაში მიღებული ქულათა რაოდენობა. დამატებით გამოცდაზე მიღებული შეფასება არის დასკვნითი შეფასება და აისახება საგანმანათლებლო პროგრამის კომპონენტის საბოლოო შეფასებაში.

შუალედური შეფასება დაყოფილია კომპონენტებად. შუალედური შეფასების კომპონენტების შინაარსსა და ხვედრით წილს განსაზღვრავს სასწავლო კურსის განმახორციელებელი პერსონალი შესაბამისი სილაბუსის ფარგლებში.

დასკვნით გამოცდაზე სტუდენტი დაიშვება შუალედური შეფასების მინიმალური ზღვარის გადალახვის შემთხვევაში. დასკვნითი გამოცდა ჩაითვლება ჩაბარებულად დასკვნითი გამოცდის მინიმალური ზღვარის გადალახვის შემთხვევაში.

შუალედური შეფასებისთვის და დასკვნითი გამოცდისთვის განსაზღვრულია შემდეგი მინიმალური კომპეტენციის ზღვარი: შუალედური შეფასების 42 %, დასკვნითი გამოცდის შეფასების 50%+1. სასწავლო კურსის განმახორციელებელი პერსონალი, სასწავლო კურსის სპეციფიკის გათვალისწინებით უფლებამოსილია სილაბუსით განსაზღვროს დადგენილისგან განსხვავებული (უფრო მაღალი) შუალედური და დასკვნითი შეფასებების მინიმალური კომპეტენციის ზღვარი, საქართველოს მოქმედი კანონმდებლობით დადგენილი მოთხვნის შესაბამისად.

კრედიტი ათვისებულად ჩაითვლება თუკი შუალედური შეფასებისთვის დადგენილი მინიმალური ზღვარის და დასკვნით გამოცდაში დადგენილი მინიმალური ზღვარის გადალახვის საფუძველზე მიღებული ქულების დაჯამებით მიიღება 51 ქულა ან მეტი.

სწავლის გაგრძელების შესაძლებლობა

ეკონომიკის საბაკალავრო საგანმანათლებლო პროგრამის კურსდამთავრებულს უფლება აქვს სწავლა გააგრძელოს უმაღლესი განათლების მეორე საფეხურზე - მაგისტრატურაზე.

შენიშვნა: საბაკალავრო პროგრამის დანართები წარმოადგენს პროგრამის განუყოფელ ნაწილს.

ეკონომიკის საბაკალავრო საგანმანათლებლო პროგრამის ხელმძღვანელი:

ასისტენტ-პროფესორი, აკაკი მოსახლიშვილი

ა. მოსახლიშვილი

ხარისხის უზრუნველყოფის სამსახურის უფროსი:

თათია ხარაბაძე

თ. ხარაბაძე